




Niuspepa bilong ol Papua Niugini stret

# Wantok 12t

Viles Kot

p.3

Wes Irian Stori  
p.10



Poto - Bruce May

Ol sumatin meri bilong Loaga Komyuniti Skul long Misima Ailan, Milen Be i wokim singsing. Ol i amamasim ol bikman bilong ples taim ol i kibung long **Bwagaioia**.

## Kisim Bek Plantesen

Gavman i givim tripela mun tasol long 13 man long stretim plantesen bilong ol. Sapos ol dispela man i no stretim na lukautim gut plantesen bilong ol insait long tri mun taim, sori tumas long ol. Gavman bai kisim ol dispela plantesen wan tu.

Minista bilong bosim graun (Lans), Mista Thomas Kavali i bin givim tok lukaut ya i go long ol 13 bos bilong ol dispela plantesen long las wik, Epril 1.

Ol plantesen ya, em Baia-Kauru insait long Sentral Provins. Makada na Laup na Matanakunai plantesen insait long Is Niu Briten. Long Niu Ailan Provins, em long, Nagogo na Kilansirik na Matakau plantesen. Banis na Rava-Rugen plantesen long Not Solomons. Na long Madang Provins, em Matukar na Erimahafen. Sawataitai plantesen na Sebulugomwa plantesen, em tupela i stap long Milen Be. Na Kesu na Kaisenik plantesen i stap long Morobe. Komuli na

N'Drova plantesen i stap long Manus. Na Westen Provins i gat Mibu na Madiri plantesen.

Em hia nem bilong ol plantesen na papa bilong ol.

1. Baia-Kauru, Banis, Rava-Rugen . . . . . Burns Philp.
2. Makada, Laup . . . . . Mista Yan Chaing.
3. Matanakunai . . . . . Mista C. Caulfield.
4. Matukar . . . . . Mista Brian Theodor Rosenzweig.
5. Erimahafen . . . . . Mista Jackson Tsang.
6. Komuli, N'Drova . . . . . Mista Brian Campell.
7. Kesu . . . . . Mista Valentine.
8. Kaisenik . . . . . Mista Thomson.
9. Sebulugomwa . . . . . Papa i go stap nau long Niu Silan.
10. Mibu, Madiri . . . . . Papa i dai pinis. (igo long pes. 2)

Smatpela man i save baim sea long Invesmen Koporesen

Sapos yu laik save moa rait i kam long

### Investment Corporation of Papua New Guinea

P. O. Box 155, Port Moresby.



# MIPELA WET

"Mi singautim plis na ol i no kam helpim mi." "Mi painim trabel tasol ol plis i no laik helpim mi." "Mipela ol raskal i no wari long ol plis. Ol i no gat bun."

Kain toktok olsem i kamap long planti ol taun nabaut insait long PNG. Planti man i no bilip moa long ol wok bilong ol plis. Planti man i ting ol i stap insait long wanpela kantri i no gat plis.

Kain tingting olsem i wok nau long bagarapim yumi. Kain tingting olsem i mas pinis. Nupela Gavman i mas hariap long stretim ol dispela wari bilong ol pipel.

Nupela Gavman i mas givim bun long ol plis. Nupela Gavman i mas wok long givim moa trening na save long ol plisman. Ol i mas kisim ol gutpela i strongpela man tasol i kam insait long wok plis. Na tu i mas givim strongpela mekim save long ol plis, sapos ol i no mekim gut wok bilong ol.

Ol pipel i les pinis long harim ol tok promis long stretim wok plis. Ol i laik lukim ol dispela tok promis i karim kaikai. Ol i laik lukim plisman i gat save. Ol i laik lukim plisman i no pret long mekim wok bilong ol.

Mipela wet i stap.

**Tram Borneo Piksa Nau!**

BORNEO PIKSA, em i namba wan ples bilong wasim piksa. Yupela salim ol Kala film wantaim blak/wait films, na kain kain eni film kam. BORNEO PIKSA, bai developim na primim ol piksa, na salim i go bek long yupela wantaim nupela FRI FILM!

**BORNEO PIKSA HELDSBACH P.O. BOX 217 FINSHAFEN**

**WANTOK NIUSPEPA**

Nius i kamap 52 taim long yia nau.

Opis bilong Edita na Edvetaising long P.N. G. P.O. Box 1982, Boroko  
Telipon: 25.2500 Teleks: NE 22213

Edvetaising long Australia  
Central Media Sales, Sydney  
Telipon: 436.1000 Teleks: AA23211

**PE BILONG WANPELA YIA, 52 NIUSPEPA**

Ples	Kam long balus	Long sip
Mosbi	K 10.00	K 10.00
P.N.G.	K 14.00	K 14.00
Australia	A\$ 36.00	A\$ 29.00
N.Z., Fiji		
Pasifik Ailan	NZ\$47.50	NZ\$ 32.00
USA, Yurop	US\$ 70.00	US\$ 47.00
	DM 120.00	DM 81.00
	L 31.00	L 21.00



# HMS Swan

Dispela poto i soim HMAS SWAN, wanpela Woa Sip insait long Nevi bilong Australia. Sip ya i kam long 31 Mas long Pot Mosbi long lukluk raun na soim pes tasol. Dispela Woa Sip i gat moa long 200 sela i stap wok long en. Ol i lukluk raun long Mosbi long 4-pela de tasol. Bihain HMAS SWAN bai sel i go olsem long ol kantri long Asia. Dispela Sip em i inap long autim sabmarin. Em i ken pait wantaim balus na tu i ken mekim wok long painim wanem sip o bot i lus na ol kain helpim olsem.

Long Julai, Gavman bai sekap long ol dispela 19 plantesen. Gavman bai lukim sapos ol papa i stretim pinis o nogat.

Mista Kavali i tok, nau planti bilong ol i no luk olsem plantesen tru. Ol i bagarap tru. Na sapos long Julai ol i no stretim liklik, lukaut. Em nau bai mipela i antapim tru papa bilong ol dispela pantesen.

Em i tok, long tingting bilong mi, mi mas tok klia pastaim long ol papa ya. Kontrak bilong ol i gat tok olsem, ol i mas lukautim gut plantesen bilong ol. Sapos nogat, bai mipela i go tasol na baim plantesen bilong ol. O tu,

mipela i ken rausim ol na kisim plantesen.

Mista Kavali i tok, sampela papa i stat long stretim ol wok long plantesen bilong ol. Sapos ol i laik salim plantesen orait, Gavman i ken givim ol gutpela prais long baim hatwok bilong ol.

Em i tok pe ya bai baim ol papa long mani ol i lusim long mekim gut plantesen bilong ol. Na tu mani ol i lusim long plantim ol nupela diwai, o wokim ol nupela haus.

Klostu nau Lans Dipatmen (Dipatmen bilong bosim graun) bai stretim ol wok bilong baim bek 10-pela plantesen. Ol dispela plantesen i stap long

Sentral, na Is Niu Briten, na Niu Ailan na Madang Provins.

Em hia nem bilong ol dispela plantesen. Ilolo na Otomata i stap long Sentral Provins. Winalin, na Tobera, na Kurajong, na Watersmeet na Nuwok plantesen i stap long Is Niu Briten, Kalili plantesen i stap long Niu Ailan. Na Awar plantesen i stap long Madang.

Mista Kavali i tok, dipatmen bilong em i makim pinis K800,000 bilong baim ol dispela plantesen.

Dispela wok olpela gavman i putim bilong baim plantesen na givim ol pipel i kaikaim moa long 6 milien kina.

# NIUS-NIUS-NIUS

★BIKMAN I KAM – Namba tu Primia bilong Saina bai kam lukluk long Papua Niugini long Epril 27. Nem bilong dispela bikman em, Mista Li Xinnian. Em i laik bekim bek lukluk raun bilong Praim Minista bipo, Mista Michael Somare na Sir Julius Chan. Olsem tasol na pesman bilong Saina husat i stap long Australia i kam pinis raun long Mosbi long toktok wantaim Gavman bilong PNG.

★SEKAP LONG V.E.D.F. – Minista bilong Komes na Industri, Mista Opai Kunangel, i tok em bai kirapim wanpela komiti long lukluk i go insait long Viles Ekonomik Developmen Fan. Mista Kunangel i tok, em i ting sampela long ol dispela mani i paul na em i laik painim aut sapos Gavman bipo i bihainin tru lo bilong VEDF na givimaut ol mani o nogat. Memba bilong Obura-Wonenara, Mista Lennie Aparima i tok nupela. Gavman i no mekim rabis pasin long olpela Praim Minista Michael Somare. Nupela Gavman i no rausim em long haus bilong em long Mosbi. Em i tok, ol i givim em tupela ka long yusim na wanpela haus long 3 mail hill long Mosbi. Em i tok olsem bihain long toktok i raun olsem, nupela Gavman i no lukautim Somare gut.

# TAMBU TORO

TORO I LAIK KISM POTO BILDUNG OL MAN PICAI SOKA

EM NO LUKIM MAN IKIKIM BAL LONG BAKSAIT BILONG EN

SAL IKAM PAITIM HET BILONG EN

NA EM I PUNDAUN NDGUT TRU LONG GRAUN

Sampela ol pipel i ting viles kot i wantok sistem na em i sasim ol man long bikpela mani. Na tu ol i givim bikpela mekim save. Olsem ol i laik kisim wari bilong ol i go long lokal o distrik kot.

Tasol lokal kot yet i ken sindaun wantaim ol na harim gen dispela kot bilong ol. Na bihain lokal kot yet i ken rausim dispela sas o em i ken orait long dispela sas. Sapos nogat, lokal kot i ken tokim viles kot long harim gen dispela kot. Dispela toktok i kam long Viles Kot Seke-teri, Mista Kila Garo, insait long bik opis bilong Viles Kot long Waigani, Mosbi.



Mista Kila Garo

Mista Garo i tok, i tru, sampela viles kot i no harim gut kot. Tasol planti viles kot long Papua Niugini i ran gut na mekim wok bilong ol gut tru. Yumi no ken sutim tok long viles kot. Sapos ol pipel sanap long kot i ting viles kot i no harim kot gut, orait ol i ken go lukim lokal kot. Na lokal kot i ken harim kot gen.

#### Wok Hat Tru

Mista Garo i tok planti viles kot i wok hat tru namel long komyuniti bilong ol long stretim wari na sindaun bilong ol. Ol mejistret, kuskus na viles plis i wok hat na planti taim ol i wari olsem Gavman i kirapim dispela samting, na subim ol long dispela wok.

Olsem i no tingting bilong ol. Em i tok, planti mejistret i ting, ol i wok nating na ol i mekim gut wok bilong ol. Sapos Gavman i givim moa mani long ol na yumi apim pe bilong ol, ating bai ol i wok gut.

Long mun Mas yet, nupela Minista bilong Jastis, Mista Paul Torato, i tok aut olsem, Dipatmen bilong

em i apim pinis pe bilong ol viles kot opisa.

Nau long dispela taim ol viles kot mejistret i save kisim K7 long wan wan mun. Kuskus i save kisim samting olsem K6.

Long dispela yia i at 738 viles kot insait long PNG. Sauten Hailans i win tru. Em i gat 79 viles kot olgeta. Simbu Provins i gat 74 na Isten Hailans i gat 70. Milen Be i gat 5-pela viles kot tasol.

#### Kirap long 1975

Gavman i kirapim Viles Kot long yia 1975. Long yia 1976 ol i kirapim 4-pela opis we ol viles kot insait long wan wan provins i ken kisim helpim long dispela opis.

Opis bilong Papua Rijen i stap long Waigani. Opis bilong Hailans i stap long Hagen. Bilong Not Kos i stap long Madang na opis bilong ol Ailan i stap long Rabaul.

#### Viles Kot Opisa

I gat wan wan opis ol i kolim olsem Provinsal Viles Kot Opisa i stap long ol dispela rijinal opis. Ol i save go aut long olgeta mun na lukluk long

olgeta viles kot. Ol i go helpim ol na lukluk long we ol i ranim viles kot. Ol Provinsal Viles Kot Opisa i kirapim ol nupela viles kot. Na tu ol i trenim ol mejistret, kuskus na plis bilong viles kot.

#### Viles Kot Skul

Olsem na bilong givim moa save long ol provinsal viles kot, i gat wanpela skul i stap long Madang we ol provinsal viles kot opisa i ken kam tren long karim wok bilong ol.

Sapos wanpela viles kot i kirap pinis, ol opisa i singautim olgeta viles kot mejistret, kuskus viles plis. Na ol i kam kisim tu wik trenim long we bilong harim kot.

Long dispela taim, ol lokal gavman kaunsil long olgeta provins i lukautim ol viles kot long pe na ol arapela samting olsem. Tasol long las wik, Primia bilong Morobe Interim Provinsal Gavman, Mista Pama Anio i tok em i laik lukim viles kot i kam aninit long Provinsal Gavman. Em i tok Gavman bilong em i laik lukautim olgeta viles kot.

# Viles Kot

## Majistret

### Onno Maraga

Long viles kot eria bilong mi pipel i pret long wokim ol trabel nau. Dispela long wanem pawa bilong viles kot i stap. Dispela toktok i kam long Mejistret bilong Kila Kila Viles Kot Eria, Mista Onno Maraga. Bipo planti trabel i wok long kamap long ples. Nau i no gat planti wari i stap nau.


Mista Maraga i gat tupela wok. Wok tru bilong em i olsem wanpela kuskus long Dipatmen bilong Praimeri Industri. Long olgeta Fonde em save lusim wok i go long ples long harim kot bilong ol pipel. Em i tok, long yia 1977 viles kot bilong Kila Kila i kirap. Ol pipel i votim mi i go insait olsem Mejistret bilong ol.

Long namba wan yia bilong mi olsem Mejistret mi painim hat tru long wokim dispela wok. Nau mi save pinis long dispela wok na olgeta kot mi save harim i go namba wan tru. Ol i skulim mi pinis long tupela wik na bihain Provinsal Viles Kot Opisa (PVKO) i givim mi wanpela lo buk.

Long dispela lo buk i gat 18 lo i stap na i gat sas bilong ol dispela lo. Olsem mi ken bihainim na sasim ol pipel long wanem lo bilong ples ol i brukim. Sapos ol pipel i sanap long kot mi bihainim dispela lo buk long sasim ol pipel.

Mi save yusim baibel tu long helpim mi. Mi ting olgeta lo i stap insait long lo buk i wan kain olsem ol lo bilong God i stap insait long baibel. Olsem na mi save bihainim baibel long wanem sas mi putim long ol trabel man.

Sapos wanpela pikinini i kamap long kot long namba wan taim, mi skulim em long lo tasol na larim em i go. Bihain sapos em i bik-



Onna Maraga

het gen, mi ken sasim em long K2 i go inap long mak bilong K50. Sapos trabel i liklik tumas, mi save tokim trabel man long klinim ples o mekim sampela wok long ples inap long 3 o 4 wik.

Sapos ol pipel i no mekim dispela wok orait kuskus bai kirap raitim oda bilong kalabus i go long lokal o distrik kot.

Lokal o distrik kot i orait long dispela oda em nau dispela man i sut i go long kalabus. Mejistret yet i ken tok long hamas wik em i ken stap long kalabus.

## Majistret Pala Kila


Taikone i wanpela viles i stap insait long Mosbi siti. Mi wok olsem wanpela mejistret long wan yia pinis. Nau mi go insait long namba tu yia. Mi painim olsem dispela wok i hat liklik, tasol mi yet mi pilim mi inap winim dispela wok.

Mi laikim tru dispela wok. Mi kisim tupela wik trening long kamap olsem Mejistret long Kila Kila Kaunsil Haus. Bihain mi kisim setifiket. Wok bilong mipela i olsem. Pis opisa o viles plis i kisim trabel bilong ol pipel i kam.

Em i karim i kam long viles kot kuskus na kuskus yet i salim ol samonpepa i go long ol trabel man long sanap long kot. Viles kot bilong mi i save harim kot long olgeta Trinde. Long wanpela de mi ken harim samting olsem 10-pela kot.

Sapos mi painim olsem trabel i liklik mi tokim dispela man long klinim ples. Sapos mi tokim wanpela man long baim kot orait pes taim em baim K5. Bihain sapos em i wokim gen pe i go antap long K10. Ol pe mipela sasim i go inap long K50 tasol.

Sapos mi tokim wanpela man long baim kot o klinim ples na em i bikhet long tok bilong kot na i no wokim, orait yumi salim wanpela oda bilong kalabus i go long lokal kot. Lokal kot yet i orait long dispela oda na salim



Pala Kila

dispela man i go long kalabus.

Olgeta sas i stap insait long lo buk. Taim mi harim kot mi mas lukim lo buk pastaim na sasim ol pipel aninit long lo ol i brukim.

Ben Kasanda



## Wokim Progrem Gait

gutpela sapos olgeta liklik redio stesin i wokim aut o raitim ol progrem gait bilong ol na salim long Wantok Pablikesen na ol i ken pablisim na salim long olgeta man long PNG.

long harim sampela gutpela progrem olsem: Redio Dokta, Redio Didiman, Progrem bilong ol plis na sampela kain progrem olsem.

Sapos planti man i gat dispela taim tebol we em i soim wanem taim bai dispela progrem bai kam-

ap, ating bai i gutpela tru.

Bikpela stesin bilong NBC long Mosbi i gat dispela. Dispela bai mekim isi long ol pipel i ken save long taim na de dispela kain progrem bai kamap. Kain progrem olsem mi raitim daun pinis, em ol i gutpela progrem inap long helpim yumi wan wan. Tenkyu tru.

Didiman Kakaruk, Kieta, N.S.P.



## Viles Kot Opisa

### Slip Tumas

Dia Edita — Plis inap long yu givim liklik spes long mi autim wari bilong mi? Wari bilong mi i go olsem. Long hap bilong mi long Bogia, ol viles kot mejistret i no mekim wok bilong ol

## Mipela Madang Gutpela Man

Dia Edita — Plis yu givim liklik spes bai mi bekim tok bilong pren ya, Paul Wambung. Pas bilong em i kamap long wantok niuspepa long mun Janueri Sarere 19, 1980. Em i tok long pablik toilet long Madang i gat ol piksa na tok nogut long banis bilong toilet. Na tu em i tok ol man bilong Madang mas lukim.

Yes pren Paul Wambung, yu save

hamas pipel nau ol i wok long Madang taun. Mi tokim yu ol kain hambak olsem i no kamap long ol pipel bilong Madang. Nogat. I gat planti man bilong olgeta provins, nau ol i wok long Madang Taun.

Na mipela i no save husat tru i droim o raitim long toilet. Long tingting bilong mi, ating yu wanpela man bilong wokim ol kain hambak pasin

olsem tu. Na pasim maus bilong yu na yu stap tasol long wanem, yu no save o yu no lukim man. Tenkyu.

Thomas Kalual, Bogia, Madang Provins.

Salim ol pas i kam long: WANTOK BOX 1982 BOROKO

## Kirapim Tok Pisin Skul

Dia Edita — Yu inap long givim mi liklik spes long putim kamap sampela wari bilong mi long Wantok Niuspepa.

Wari bilong mi i go olsem: Ol memba bilong Palamen na ol lidaman bilong Gavman, ol i no save toktok long kirapim tok pisin skul.

Mi ting, dispela kain skul, em inap

long helpim ol pipel gut tru. Mi lukim planti yangpela man meri ol i pinisim stendet 6 bilong ol na ol i stap nating. Em ol i ken i kam kisim save long sampela wok.

Ol lida bilong Gavman i no save lukluk raun long wan wan provins na helpim ol long sampela wok. Olsem bai dispela

kain. Gavman bai helpim tok pisin skul.

Bai ol yangpela man meri i ken kisim gutpela wok na kantri bilong yumi i go het. Em tasol liklik wari bilong mi. Sapos husat yu sapatim tok bilong mi rait tasol long Wantok Nius. Tenkyu.

Womndo Moap, Angoram. Is Sepik Provins.

## Rangema Ben Laik

Dia Edita — Yes, mi save putim redio Morobe na mi save harim ol kandere ya, Rangema String Ban olgeta taim i save kamap long redio.

Yes ol wantok, mi save stap wantaim ol sampela pren bilong mi long sentral provins yet na olgeta taim mi putim redio

Morobe na Rangema ban i save kamap. Man ol pren bilong mi ol lap na ol tok dispela Rangema ban i no luk olsem wanpela pilai gita singsing. Em olsem singsing kundu bilong ol Tumbuna bilong bipo tru.

Yes ol brata, ating yupela mas lusim pilai gita na singsing kun-

## Gutwan

du bilong Tumbuna tasol.

Ol brata sapos husat man o meri bel nogut o kros long mi, ples rait tasol long Wantok Niuspepa bai mi amamas long ritim. Tenkyu.

Michael Gwae, Lae, Morove Provins.

# MIPELA SAVE MEKIM OLKAIN WOK BILONG BENG

☆ Pas Buk

☆ Sek Buk

☆ Man i ken putim mani long beng na winim profit mani

☆ Sapos yu kisim narakain mani bilong wanpela arapela kantri, beng i ken senisim i kamap kina na toea.

☆ Ben i ken stretim olgeta tiket bilong yu, sapos yu laik go lukluk raun long arapela kantri.

**Bank of New South Wales (PNG) Ltd.**

## Mipela amamas tru long helpim yu

Na em tasol liklik wari bilong mi na

Alphonse. D. Makao, Madang Provins.

## Maritim Saveman Tasol

Dia Edita — Inap yu givim liklik spes na mi sapatim wantok ya Pius Kakunambi bilong W.S.P.

Em tok long ol meri maritim save man tasol. Yes brata em i tru. Mi save lukim olgeta hap provins. Ol save meri maritim ol save man tasol. I no long Aitape tasol.

Yes, brata em i tru. Ol stap long taun na ol hambak. Sapos kampani rausim ol long wok, bai ol painim ples stret.

Tarangu ol man long ples, ol inap na stap. Na yu save meri or save man, yu stap long han bilong gavman na yu hambak.

Sapos em rausim you long wok, bai yu painim ples. Stupit man em i no inap helpim yu long kaikai o mani.


Sapos yu save man na meri yu belhat orait, rait tasol long Wantok Nius, bai mi lukim.

Em tasol mi sapatim brata ya Pius Kakunambi. Tenkyu.


Casper Manub Madang Provins.

OLAMANI MI MAS RAITIM PAS LONG WANTOK





Bikpela balus bilong Nu Silan i karim ol sipsip i kam. Balus hia i narakain tru. Bel bilong em i op olgeta na ol i rausim kago.



Hia yu ken lukim ol sipsip i stap insait long ol kes. Ol wokman i laik rausim nau.

# Wok Sipsip Long Hailans

Yu laik long kamap hostes long wanpela kago balus i karim sipsip? Long mun Mas wanpela kago balus bilong Niu Silan i karim 850 sipsip i kam long Nadzab ples balus. I gat wanpela hostes i stap was long ol sipsip insait long balus taim ol i karim sipsip i kam.

Gavman bilong Niu Silan i salim 850 sipsip olgeta i kam. Gavman bilong Niu Silan yet i baim long K126,000.00 (126 tausen kina). Ol yet i baim balus tu long karim ol sipsip i kam.

sipsip i karim ol piki-nini ol inap stap gut insait long ol stesin long Hailans. Na tu pipel bilong Hailans inap long baim taim ol i kamap planti.

Long yia 1976, Gavman bilong Niu Silan i salim 881 sipsip i kam long PNG. Dispela sipsip i stap yet long Hailans. Dipatmen bilong Praimeri Industri i ting taim dispela nupela

sipsip i bung wantaim ol arapela lain sipsip em ol i stap pinis, ol bai karim ol sipsip i gat bikpela gras tru long en. DPI i trenim ol man bilong ples tu long we bilong lukautim ol sipsip bihain.

Nau long dispela taim, i gat sampela man long ples i wok long lukautim ol sipsip i stap. Sampela i stap insait long wan wan provins insait



long Hailans. Ol dispela sipsip Niu Silan Gavman i salim i kam long PNG ol i baim long ol fam nabaut insait long kantri bilong ol. Ol i salim dispela sipsip i kam olsem wanpela we bilong helpim PNG i go het. ● Ben Kasanda


Dispela sipsip bai stap insait long Menifo stesin klostu long Goroka. Long dispela Dipatmen bilong Praimeri Industri bai lukautim ol. Na taim ol



Ol sipsip long Menifo Stesin, Goroka.

Poto - Nu Silan Infomesen

*Smile*  
Coke  
adds  
life



## Krosim Wantok

Memba bilong Mendi long Sauten Hailans Provins. Mista Posu Ank i tok, em i wari tru long pait ol lain wan pisin i wok long mekim long Mendi.

Ol lain Tukuzup na ol lain Surup i wok long mekim dispela pait. Mista Ank, em i bilong Tukuzup lain. Tasol em i tok, em i no inap sapotim o helpim ol lain bilong em long pait.

Wanpela yangpela marit man bilong Tuguzup lain i bin mekim sem-pasin wantaim wanpela marit meri bilong Surup lain. Olsem na


plis na kot tasol bilong stretim.

Em i tok, dispela yangpela man, i bin mekim sem-pasin wantaim planti marit meri pinis. Mista Ank i kros tru nau. Long wanem rong bilong dispela wanpela man i wok long mekim tupela lain olgeta i pait.

Mista Ank i tok, em bai go bek long ples na helpim ol plis

na kot long stretim dispela trabel.

Em i tok, em i sem tru, long wanem ol lain bilong em i statim dispela trabel. Mista Ank i tok, ol Sauten Hailans pipel i mas traim larim ol loman bilong kantri i lukautim ol trabel. Na ol pipel yet i no ken kamap loman.



# dispela pisin yumi lukim oltaim... nau i go long Australia!

Air Niugini tasol i save i go i kam long Australia 8-pela taim long wanpela wik. Mipela i save flai planti taim. Na mipela i save givim sevis long we yu yet laikim. Mipela i save flai i go long Sydney na Brisben na Cairns.

# ...mipela i gat gutpela Fraide Sevis

Air Niugini tasol inap givim yu gutpela Fraide nait sevis i go olgeta long Sydney. Balus i save kirap long 5 klok apinun long olgeta Fraide. No ken tingting long lusim wok hariap long go kisim balus. Na dispela balus i save go olgeta long Sydney. Sampela balus i save mekim ol pipel i stap wan aua nating long Brisben. Tasol mipela nogat. Na tu, sevis bilong ol dispela "Bird of Paradise", em i nambawan tru. Ol arapela balus i save mekim ol pipel i sanap long longpela lain. Tasol mipela nogat. Tingim gut. . Air Niugini tasol, em i nambawan we bilong flai.

Ringim tasol Air Niugini Intenesenal Resevesen bilong kisim moa toksave o bilong bukim balus. Em hia namba, 252066. O yu ken ringim tu husat man i lukautim ran bilong Air Niugini balus long hap bilong yu.



Misis MacKenzie i statim pinis wok bilong em olsem Skul Inspekta. Em hia, em i wok long lukluk raun long Diharoha Komyuniti Skul long Kila Plis Barek long Mosbi.



Ol pikinini i wok long kisim skul long pasin tumbuna. Wanpela man bilong ples i kam long skulim ol long kain kain we bilong paitim kundu. Misis MacKenzie tu i bin stap insait long dispela lesen.

Mi no lukim wanpela samting i pasim ol meri long holim kain wok olsem. Sapos ol man i save mekim kain wok olsem, ol meri tu i mas wok klostu klostu long ol man. Em, Misis Regina Albira Mackenzie namba wan PNG meri long kamap Komyuniti Skul Inspekta i tok olsem.

Em i tok long taim laik senisim o kisim bilong skul em i save i kam insait long skul. holim ol liklik kibung Em, ol kain samting wantaim ol tisa. Em i olsem skul wok bi-laik harim wanem long ol pikinini o kain pasin ol tisa i arapela kain pasin bi-

long skul. Olsem bai skul inap senis long laik bilong ol tisa bilong dispela skul stret.

Mista Paul Songo, Sekreteri bilong Edukesen yet, i bin makim em long kisim dispela wok. Em i makim meri ya long namba 5 de bilong mun Mas.

Misis Mackenzie i go long praimer na hai skul long Not Solomons. Bihain em i tren long tupela yia long kamap tisa. Long 1973 em i go long Yunivesiti ov Sydney. Em i go bilong kisim skul bilong wok wantaim ol pikinini husat i kisim bagarap long hap bodi bilong ol. Em i skul inap wan yia. Pinis, em i kisim setifiket bilong wok wantaim ol yau-pas pikinini.

Long 1974 na 75,



em i skul long Yunivesiti ov PNG. Taim em i pinis, ol i givim em Diploma bilong tism tok Inglis olsem namba tu tok ples long ol pipel.

Long 1976, em i Hetmistres bilong Jun Vali Komyuniti skul long Pot Mosbi. Em i bin wok tu long sampela hap bilong Nesenal Kaptial Distrik. Not Solomons tu, em i wanpela provins we em i bin wok long en.

Nau tasol, em i stap Hetmistres bilong Wodstrip Demostresen Skul na ol i makim em long kisim nupela wok ya.

Lily Tabua

## Kukim Gutpela Kaikai

### PITPIT WANTAIM KOKONAS

Samting yu mas gat:

- 10-pela o 12-pela pitpit.
- Wanpela tomato.
- Wanpela anian.
- Tupela drai kokonas (skrapim).
- 1½ kap wara (bilong putim long kokonas).

We bilong wokim:

1. Rausim skin bilong pitpit na katim ol long tu hap.
2. Katim anian na tomato.
3. Putim pitpit na anian long sospen. Pinis orait putim sup bilong kokonas insait long sospen.
4. Boilim inap pitpit i tan.
5. Putim tomato na hatim gen inap 5 minit.
6. Kaikai wantaim rais o kaukau long taim bilong kaikai.

# Baim Olpela Mani

## WANPELA BIKPELA BISNIS BILONG BAIM KOIN MANI

Mipela i laik baim ol silva koin mani bilong Australia bilong bipo yet i kam inap long 1966. Na tu mipela i laik baim Niugini silings na ol 50 sens Australia mani no gat kona long en ol i wokim long yia 1966.

Mipela bai baim olsem:-

- K1 long ol ilorin ( tu siling).
- 50 toea long ol siling (wan siling) Australian.
- K1 long Niugini siling.

Mipela bai stap long ol dispela ples hia stat long 10 klok moning i go inap long 6 klok apinun.

RABAU	Ascot Hotel Konferens Rum	Epril de 11	922111
KOKOPO	Distrik Opis, Kokopo	Epril de 12	
KAVIENG	Provinsal Gavman Esembli Hol	Epril de 14	942199
BUKA	Kubu Lodge	Epril de 16	
KIETA	Kieta L.G. Kaunsil Samba	Epril de 18	956175
PANGUA		Epril de 19	
BUIN	Buin Komyuniti Senta	Epril de 21	
ALOTAU	Provinsal Gavman Esembli Hol	Epril de 24	
POT MOSBI	Davara Hotel, Rum 9.	Epril de 26	212100

SOUTHERN CROSS COIN CENTRE

G.P.O. Box 1200, Brisbane 4001. AUSTRALIA.



## Madang Wimens De

Madang Wimens De selebresen long 24 Mas i winim tru 2-pela arapela selebresen ol i holim long yia 1978 na 1979.

Long wanem planti wimens grup bilong Madang i kamap long dispela selebresen. Filipino Wimens Asosiesen bilong Madang tu i kamap wantaim ol kain so na danis bilong ol. Ol lain i kamap long dispela selebresen em long Filipino Wimens Asosiesen, Kantri Wimens Asosiesen.

# MOOA

LONG MONI BILONG YU

**Nupela!**



## TRAKA I WOKIM GUT OLGETA SAMTING

Wantaim 1166cc ensin,  
Traka i gut tru long draivim  
na em i gat strong long go antap  
long ol maunten na long rot i nogat kolta.  
Yu inap foldim ol sit sapos yu laik karim  
kago long baksait.  
Gutpela Toyota mechanical parts i givim gutpela wok.  
Tasol bai yu mas kisim spares tu  
sapos yu laikim.  
TRAKA i wok tupela wei na i gutpela transport  
bilong ologeta wantaim prais ino dia tumas.  
Go lukim ol - Draivim ol nau long ELA MOTORS.



TOYOTA  
**TRAKA**




**ELA MOTORS**

A Member of Burns Philp Group

YU ASK LONG EN. YU KEN KISIM

# TOYOTA

## PLIS KOMISINA I DAI



Bill Tiden

Komisina bilong Plis bipo, bilong Papua Niugini olgeta, Mista William Tiden, i dai pinis long Tunde nait. Epril 1 long Nonga Haus Sik, insait long Rabaul. Em i dai bihain long taim em i painim bikipela sik tru long ples.

Mista Tiden i pinis wok olsem Komisina bilong Plis long yia 1979. Em i wok insait long Plis Fos long 41 yia olgeta. Long yia 1938 em i kamap plisman. Em i wokim we bilong em i kam antap na long yia 1976 em i kamap Plis Komanda bilong Niu Ailan Provins. Long yia 1977 Plis Dipatmen i makim em Komisina olsem namba wan bilong ol Plis. Mama i karim Tiden long yia 1925 long Matalau Viles insait long Is Niu Briten Provins.

## KOPRA-KAKAO-KOPI

PE BILONG KAKAO - KOPRA - KOPI

KAKAO - K1,710 wan wan tan.

KOPRA - Hot Air - K259 wan wan tan.  
FMS - K256 wan wan tan.  
Smok - K254 wan wan tan.

Sab-Depo:

Namatanai - ol tekewe K21 long wan wan tan.

Buka - ol tekewe K22 long wan wan tan.  
Finschafen - ol tekewe K26 long wan wan tan.

Samarai - ol tekewe K27 long wan wan tan.

KOPI - Y Gred K2.26 inap K2.28 long wan kilo.  
X Gred K2.29 inap K2.34 long wan kilo.  
A Gred K2.33 inap 2.39 long wan kilo.

Robusta K2.14 inap 2.20 long wan kilo.

Pe bai yu kisim long wan wan taun.

Kainantu - K1.47 tasol.  
Goroka - K1.30 inap K1.55.  
Kundiawa - K1.40 tasol.  
Minj/Banz K1.46 inap K1.59.  
Maun Hagen K1.56 tasol.  
Wapenamanda - K1.28 tasol.  
Lae - Arabica K1.15 inap K1.25.  
Robusta K1.00 inap K1.15.  
Wewak - Robusta K1.00 tasol.  
Madang - Arabica K1.20 tasol.  
Robusta K1.20 tasol.




# Wokman Mas Kot

Uganda, wanpela kantri insait long Afrika bai kotim sampela wokman bilong Idi Amin i bosim kantri.

Idi Amin i bosim Uganda long 8-pela yia olgeta na insait long dispela 8-pela yia planti man meri i dai long han bilong Amin wantaim wokman bilong em.

Long yia i go pinis Tanzania, wanpela kantri i stap klostu long Uganda, i salim ami bilong ol na ol i pinisim tru ami bilong Idi Amin. Na Amin i ranawe na em i stap long sampela kantri insait long Midel Is. Idi Amin i kisim pawa long yia 1971. Nau nupela Gavman i ranim kantri Uganda.

Gavman bilong Uganda long dispela taim i wokim wanpela lo nau we ol bai kirapim kot long sanapim ol sampela wokman bilong Amin. Em, ol i helpim Idi Amin long kilim indai planti man meri nating. Dispela ol man i




stap long kalabus man.

Dispela kain kot ol i laik kirapim bai i no olsem ol kot yumi gat nau. Nogat, dispela em i wanpela arapela kain kot. Long ol kot yumi gat nau ol man i ken go fri sapos i nogat inap toktok olsem dispela man i mekim dispela kain rong.

Tasol long dispela nupela kot bai i gat wanpela jas bilong bik kot, sif mejistret o loman, wanpela ami opisa, plis opisa na wanpela bikman em pinis wok na stap nating.

Ol bai harim kot na givim aut wanem kain tingting ol i gat long mekim save long dispela trabelman sa-



pos ol i painimaut olsem em rong.

7/2/80

Ripot i tok ol memba bilong wanpela lain ol i kolim Stret Resesh Bureau bai sanap long dispela kot ol i laik kirapim.

Ol pipel husat i wok insait long dispela lain bilong Amin i mekim bikpela birua tru long ol pipel bilong Uganda.

Amin i yusim dispela grup long go aut na kilim planti pipel, em Amin i ting, ol i laik birua long em.

Tasol, planti loman i ting narakain long dispela lo. Sampela loman i laikim, tasol sampela i ting, dispela i no gutpela we long mekim save long ol man, em ol i stap wok wantaim Amin.

Dispela nupela kot bai harim kot bilong ol man husat i kilim ol pipel nating, paulim man, stil na wokim rabis pasin long narapela man.

Tasol ol trabel i no pinis. Planti ol raskal na stilman i wok yet long paulim ol man brukim haus na mekim kain kain pasin no nogut. Long dispela tasol, kot i laik traim pinisim wok kwik bai ol trabel i ken pinis.

Gemini



**AUSTRALIA, INAP TRU LONG OLKAIN SAMTING YU LAIKIM.**



**Australia, em i gat planti gutpela samting long gutpela prais. Na olistap klostu tasol**

PAINIMAUT LONG AUSTRALIA TRET KOMISINA. EM I STAP LONG POT MOSBI. EM I GAT NEM BILONG PLANTI KAMPANI BILONG AUSTRALIA HUSAT I LAIK SALIM OLKAIN SAMTING LONG PNG. EM I GAT SAVE LONG OLGETA SAMTING OL KAMPANI BILONG AUSTRALIA I LAIK SALIM LONG PNG. SAPOS YU I NO KLIA GUT LONG WANPELA SAMTING, ASKIM EM. EM INAP STRETIM WARI BILONG YU. WE BILONG SALIM TOKTOK I GO I KAM NA WE BILONG SALIM KAGO I KAM, EM I ISI TRU. AUSTRALIA, EM I GUTPELA PLES BILONG BAI OLKAIN SAMTING.

DISPELA AUSTRALIAN TRET KOMISINA, EM I KAM HIA BILONG HELPIM GO HET BILONG WOK BISNIS NAMED LONG AUSTRALIA NA PNG.



**ILEKTORAL KOMISIN AS LO BILONG IS NIU BRITEN NA SPESEL LO BILONG OL ILEKTORAT, 1980. LUK SAVE GEN LONG OL ILEKTORAT BILONG IS NIU BRITEN PROVINSAL GAVMAN. TOK SAVE BILONG OL PIPEL BILONG IS NIU BRITEN.**

Provinsal Gavman Baunderis Komisn bai kam raun long ol bikpela stesin bilong yupela, stat long Epril 14, 1980.

Insait long dispela Baunderis Komisn, i gat:-

- (1) Wanpela man bilong Ilektoral Komisn, na
- (2) Wanpela man bilong Surveyor — Jeneral, na
- (3) Wanpela man bilong Provinsal Asembli.

Ol bai holim kibung wantaim ol pipel tu. Ol i laik painimaut tingting bilong ol pipel pastaim, long we, ol i mas putim mak bilong makim ol ilektoret.

Em hia, raun bilong dispela komisn. Redi tu long ol bai holim kibung wantaim yupela.

DE	PLES BILONG KIBUNG	WANEM HAP
Tunde 15/4/80 & Trinde 16/4/80	Tobunbun Hol, Rabaul	Balanataman Kambiu Rabaul
Fonde 17/4/80 & Fraide 18/4/80	Vunadidir	Balanataman Livuan Rember Melkoi
Mande 21/4/80 am & Tunde 22/4/80 pm	UVol Palmalmal Palmalmal	Is Pomio Sentral Pomio Wes Pomio
Trinde 23/4/80 & Fonde 24/4/80	Vunamami Komyuniti Gavman Hol	Kitapaka Kokopo Raluana Toma
Fraide 25/4/80 & Sarere 26/4/80	Vunadidir	Sentral Lassul-Baining Toma
Mande 28/4/80 & Tunde 29/4/80	Vunadidir	Sentral Is Baining Raluana Toma.

R.T. Kaivlo, Siaman bilong Is Niu Briten Baunderis Komisn.

# Wes Irian Stori

Em hia stori bilong Wes Irian. Stori bilong ol wan lam, wan bisnis wan pisin bilong yumi. Hia yu ken ritim stori bilong sindaun bilong ol, bisnis bilong ol, lotu bilong ol. Long dispela stori yu ken kisim sampela tingting tu long laip na wok kamap long Wes Irian, nau em i wanpela provins bilong Indonesia.

Em hia toktok bilong we Wes Irian i kamap olsem wanpela provins.

Long yia 1882 i go inap Ogas 1962, Holan i bosim Wes Irian. Long yia 1954 Indonesia i kisim Independens long Holan tasol Wes Irian i stap yet aninit long han bilong Holan. Long dispela taim Indonesia na Holan i wok long tok kros long husat tru bai bosim Wes Irian, Indonesia i ting em i mas kisim Wes Irian olsem wanpela provins bilong em. Tasol Holan i tok no gat. Em i tok Wes Irian pipel i no olsem ol pipel bilong Indonesia. Ol i mas stap ol yet na biham ol i ken tingting long bosim kantri bilong ol yet. Tupela i wok long tok pait i go na Yunaitet Nesens i kamamel long ol. Long mun Oktoba 1962 i go inap long Me 1, 1963 Yunaitet Nesens i wok long lukautim na bosim Wes Irian. Bihain Holan i lusim Wes Irian i go long han bilong Indonesia. Olsem na nau Wes Irian i wanpela provins bilong Indonesia.

## Laip Bilong Ol

Bikpela lain man bilong Wes Irian i stap insait long maunten na bus. Ol i sindaun wan wan long ol liklik ples. Ol i sindaun wokim gaden, painim abus long bus, wokim haus na ol arapela kain pasin bilong ples yet.

Dispela em i laip bilong planti tausen man meri bilong Wes Irian. Ol pipel i stap klostu long taun i orait long wanem ol i gat rot na ol i wokim liklik bisnis nabaut.

Ol i laki tru. Long wanem Gavman i wok long kirapim ol taun pastaim. Bihain bai ol i tingting long kirapim ol liklik ples nabaut.

## Graun Na Pipel

Wes Irian i wanpela long ol 27 provins bilong kantri Indonesia. Em i winim olgeta arapela provins bilong Indonesia long wanem em i gat moa graun.

Bikpela taun bilong Wes Irian em i Jayapura. Graun bilong Wes Irian i raunim moa long 410,660 tausen kilomita. Moa long 900 tausen man, meri na pikinini i stap insait long Wes Irian.

Graun bilong PNG i raunim moa long 461,690 kilomita. Olsem graun bilong tupela ples i wankain. Dispela graun bilong Wes Irian, i gat moa moa kopa, gol, timba na wel i stap aninit long en. Dispela samting bai helpim kantri bilong ol i gohet. I gat 9-pela distrik long Wes Irian, Jayapura, Merauke, Manokwari, Sorong, Cenderawasih Be, Yapen Waropen, Fak Fak, Paniai na Jayawiyaya.

Ol pipel bilong Wes Irian i brata tru bilong PNG. Ol i gat wankain skin na tu planti kain pasin bilong tumbuna na we bilong laip bilong ol i wankain olsem PNG.

Kain samting olsem bilong wokim gaden, lukautim pik, wokim haus i wankain.

Ol pipel i stap insait long Java, Sumatra, Celebes, na arapela provins bilong Indonesia i gat narakain skin na tu ol narakain tumbuna pasin bilong ol.

## Ol I Gat Wari Tu

Wes Irian i gat kain kain wari i kamap nau long provins bilong ol. Komyunikesen, i wanpela bikpela wari long Wes Irian. Ol i no gat inap rot long go insait long olgeta ples i stap insait long bus tru. Dispela i mekim hat long bungim ol pipel wantaim long mekim wok gohet. Ol pipel i mas wokabaut i go i kam long wanem hap i no gat rot o ples balus.

Narapela wari tu olsem, i no gat planti man meri bilong Wes Irian yet i holim wok long kain taun olsem Jayapura na arapela bikpela senta insait long provins.

Planti man meri bilong arapela provins olsem Java, Sumatra na Celebes i save kam holim wok insait long Wes Irian. Ol pipel bilong Wes Irian inap holim dispela wok tasol planti taim ol i lus. Long wanem arapela man i kisim wok pinis.

Dispela asua tu i go long skul. I no gat planti Wes Irian pikinini i kisim save long skul.

Long dispela taim tu sampela pipel o lain i wok long pait yet long bruk lusim Indonesia. Ol lain bilong Fridom paitman olsem Martin Tabu na Seth Rumkorem i kirapim ami bilong ol yet long pait wantaim gavman bilong Indonesia.

## Gavman Kirapim Provins Repelita

Tasol gavman bilong Indonesia i gat bikpela lain long helpim Wes Irian i gohet. Gavman i gat wanpela progrem bilong helpim kantri gohet. Ol i kolim dispela progrem Repelita 1, Repelita 2 na Repelita 3. Dispela progrem i go insait long provins bilong Wes Irian. Long Repelita 1 progrem, Gavman i kirapim ol kain bisnis bilong wokim ol samting. Long namba tu progrem Gavman i painim ol pipel long i go insait long mekim olkain wok bisnis. Long namba tri progrem Gavman bai helpim ol pipel long kamapim moa kaikai long provins.

Gavman i tingting long mekim wok gohet long kamapim gutpela




Bikrot long Jayapura



Maket long Jayapura



Hetkwata bilong Ami



Gavman opis Jayapura

sindaun na wok bisnis na ekonomik developmen i go long ol pipel. Olsem bai Wes Irian i ken kamap wankain olsem ol arapela provins bilong Indonesia. I luk olsem Wes Irian i wanpela provins we gavman i no mekim bikpela wok long kirapim bisnis.

## Ol Bisnis

Ol pipel i wari long bisnis tu. Ol i painim hat long kirapim bisnis. Tasol i gat sampela bisnis i gohet nau. Wanpela bisnis i wok long gohet em long kilim pukpuk na salim skin bilong ol. Dispela i bikpela bisnis gavman i wok long helpim gohet.

Timba na wok bilong painim pis i wok long gohet tu long Wes Irian. Narapela ol bisnis em kopa, kakao, pala, nutmeg, kuka, na raba.

Nutmeg em i prut bilong diwai ol i wokim paura bilong mekim kaikai i swit. Pala em i wanpela bisnis we ol i wokim marasin bilong kukim wantaim kaikai.

Wes Irian i save salim samting olsem 10,000 tan kopra i go long ol arapela kantri long olgeta yia. Long Wes Irian i gat planti kopa, wel o bensin i stap aninit long graun bilong ol. Long olgeta de ol i save pulim samting olsem 80 tausen dram wel long graun.

I no gat bikpela bisnis i kirap yet long kain samting olsem nikel, cobalt, na gol. Ol i stap aninit long graun yet. Ol i gat ol dispela samting i stap aninit long graun: Wel, Kopa, Gol, Gas, Nickel, Cobalt.

## Misin Long Wes Irian

Misin tu i save helpim planti wok gohet long Wes Irian. Ol i kirapim skul na haus sik tu long planti hap bilong bus na taun. Katolik sios i wanpela bikpela sios long Wes Irian. Moa long 139 tausen man meri i katolik. I gat planti tu i bihainim ol arapela kristen misin.

Tripela bikpela lotu long Wes Irian em hia Katolik, Gereja Kristen Ingli na T.M.F. (Misin Felosip).

## Edukesen

Namel long olgeta 3-pela Wes Irian man i go long skul pinis, wanpela man tasol inap long painim wok. I no gat planti wok tu na tu ol arapela pipel bilong arapela provins i save pulimamip wok.

Em hia piksa bilong hamas skul i stap long Wes Irian na PNG:


WES IRIAN	PAPUA NIUGINI
Praimeri skul — 1,303	2,014
Hai skul — 234	94
Senia Hai — 13	4
Teknikel Koles — 35	9

Long dispela taim nau Indonesia i tok, ol i trai hat long kamapim gohet bilong Wes Irian. Tasol developmen i no save kamap long hap nait tasol. Wes Irian bai kamap bikpela o no gat yumi no ken save.

Ben Kasanda



Bikrot Jayapura



Bris long Jayapura



## Memba I Grisman Tru

Dia Edita — Mi laik yupela givim mi spes long Wantok Nius olsem bai mi putim sampela wari bilong mi. Wari bilong mi i go olsem.

Mi wantaim ol wantok bilong mi Saussya long Is Sepik Provins i no amamas tumas long memba bilong mipela long Palamen, John Jaminan.

Taim em i olsem kenditet bilong Palamen, em i save go long wan wan ples long grisim ol pipel long votim em tasol.

Em i tok, sapos yupela i votim mi, bai mi inap stretim wari bilong yupela.

Mipela ol pipel i harim ol dispela kain gris toktok na mipela i ting olsem, ating



dispela man, em i man tru bilong mekim ol samting i kamap tru.

Tasol no gat tru ya. Mipela votim em tasol mipela i no harim sampela ansa bilong ol wari bilong mipela yet long maus bilong dispela memba bilong mipela.

Taim memba i laik go long miting bilong ol memba long palamen em i no save go long wan wan ilektoret na askim ol long wanem wari bilong ol. Taim miting i pinis tu na em i kam bek, em i no save tok aut long wanem samting ol i toktok long miting. Mipela i no save harim em i toktok long ilektoret bilong em long developim sampela kain prosek, nogat tru ya. Em i save go toktok nating long sapotim ol arapela provins long toktok bilong ol.

Sori tru long yu. Nogut yu ting ol papa

mama bai vot long yu long arapela nesanel ileksen i kam bihain. Maski. Yu no ken trai hat long go raun long ples na askim ol long votim yu gen. Nogut ol bai lap tasol long yu na bai yu ranawe na lusim ol. Mipela tarangu votim yu long go long bikpela haus bilong bringim ol wari bilong mipela na stretim ol wari mipela i bin givim yu.

Mi yet, mi lukim long tupela ai bilong mi taim memba i kam bek long miting. Oloman.

Em tasol long olgeta wari bilong mipela. Yu husat man lukim dispela toktok na yu laik sapotim mipela o egensim mipela, rait tasol long Wantok Nius na bai mi ken lukim. Wantok Nius i stap wet tasol long autim wari bilong yu na mi.

Alan J. Firohu  
Kublia, Is Sepik  
Provins

## Wari Long Nes

Dia Edita — Long dispela mun Mas tok i raun pinis olsem planti tumas nes i no winim nesanel ekseminesin.

Bipo tru ating sampela nes i no inap long kamap gut — i no planti. Tasol bihain i gat moa. Nau, long dispela yia, yumi gat moa moa yet i no kamap gut. Ol i tok olsem 56% i no winim eksem pinis. Na em i no toktok nabaut tasol. Em i stret.

Ating 56% i no wari bilong ol nes tasol. Em i samting tru bilong gavman na bilong ol manmeri na pikinini long kantri bilong yumi.

Ting ting bilong mi i olsem. Sapos yumi

Salim ol pas  
i kam long:

WANTOK  
BOX 1982  
BOROKO

nogat planti nes o ol nes i nogat planti save long ol kain kain sik na bilong givim namba wan tritmen long ol, na yumi nogat nes i laik wok i stap long bikpela hausik, na nogat arapela nes i save wokabaut i go long olgeta liklik hap. wanem samting kamap? Ating husat i save sik, em i mas stap olsem.

Olgeta taim gavman i tok long apim developmen na long rausim olgeta samting nogut long ples hia. Em i gutpela tingting na ol manmeri i amamas. Tasol sapos yumi nogat planti nes ating planti manmeri husat i laik wok hat long mekim gutpela pasin bilong apim kantri, ol i stap sik na i no inap. Na sapos manmeri i dai, orait maski, nogat wari long developmen.

Yu mas tingting gut, olsem wanem tru planti tumas nes i no winim eksem. Na

ating yumi mas singaut klia long gavman i mas painim as bilong dispela samting na bihain i mas wok hariap long stretim olgeta samting nogut bilong ol nes.

J. Kalo  
Sentral Provins.



## Nogat Bilip Long Gavman

Dia Edita — Yu inap long givim mi liklik spes na inap mi autim liklik wari bilong mi? Wari bilong mi i go olsem.

Taim Mista Somare i stap o kamap Praim Minista bilong PNG

na lidim yumi, kantri bilong yumi i go gut. Na i no gat samting o trabel i bin kamap i go inap taim yumi kisim Selp Gavman na Independens.

Yumi i no kisim trabel na i no gat trabel i kam insait long kantri bilong yumi, PNG.

Mista Somare i holim kantri na wokim wok tasol i go. Na i no bin i gat trabel i kamap long kantri bilong yumi PNG.

Na nau mi askim, inap nupela Gavman i holim wok olsem Mista Somare bipo o nogat?

Mi no bilip long nupela Gavman. Kantri bilong yumi, PNG bihain bai i kamap gut o nogat? Em ol sampela wari bilong mi.

Samson Afalasi  
Goroka, Isten Hailans



# TRY YOUR LUCK

## HURRY

BUY NESCAFÉ OR IDEAL MILK NOW AND TRY TO WIN ONE OF THE RADIO CASSETTES THAT ARE BEING GIVEN BY NESTLE




**GOOD LUCK**  
from

WRITE YOUR NAME AND ADDRESS ON THE BACK OF A NESCAFÉ OR IDEAL MILK PAPER LABEL. PUT IT IN AN ENVELOPE AND ADDRESS IT TO:-

NESTLE,  
P.O. BOX 1359,  
BOROKO.  
PORT  
MORESBY



KEEP ON TRYING  
This week's winner is  
NAIMOLE WANINARA  
of KIMBE  
There's 3 more  
RADIO CASSETTES  
TO BE WON



HEB 152

# NESCAFÉ AND Ideal MILK

# Dewel Pis Singsing



kalap kalap na mekim save tru long singsing. Em i save singsing i go antap tru long het bilong wara na i save kam bek gen long daunbilo na stat gen. Man ya i save singsing i go antap i kam daun inap long taim ol pisin bilong bik moning i singaut.

Em nau, bai em i rausim het dres bilong em na putim kundu i stap na kisim ol spia na banara bilong em na bai sutim sutim nabaut long as bilong mal diwai. I go inap ol spia ya bai i bruk bruk nabaut na blut bilong ol spia. Taim em i save laik go nau, em i save kisim kundu na het dres bilong go na singsing. Dispela singsing ya nem bilong em, dewel pis.

Em bai go lusim ples na bihainim wanpela hanwara i go antap tru long bik bus. Long hap we em i save putim banara na ol spia bilong em, i stap na em i save putim het dres long het bilong em na singsing. Em i save

pikinini bilong em. Pas-taim tru, ol i save bilipim em tasol em i mekim planti taim tumas nau na ol i save olsem, em i wok long giaman. Meri bilong em i tokim tupela pikinini olsem, long wanpela taim em tu bai go bihainim man ya na traim long painim wanem samting tru i save kamap.

Orait wanpela nait, taim man ya i kisim ol samting bilong em na i laik go long bus, meri ya tu i go autsait long haus. Em i ran hariap tru i go long ples graun malumalu. Em i go na putim graun malumalu long olgeta hap bilong skin bilong em. Taim em i pinis, em i harim singsing i kam long hanwara ya, olsem na em i ran i go na hait. Em i laik lukim wanem tru i wok long mekim singsing ya.

Meri ya i go stret na painim man bilong em i stap na i laik stat nau long kalap i go antap long het bilong wara. Man ya i hatim singsing i

stap na i no lukim meri bilong em husat i isi tru wokabout i kam. Man ya i kalap kalap i stap na taim em i laik tanim het bilong em, tarangu ya i pret nogut tru. Em i lukim meri bilong em ya na em i ting olsem wanpela dewel.

Man ya i kirap tasol na i no isi long ran. Em i laik ran i go antap long het bilong wara. Meri ya tu i ran bihainim em olsem na man ya i ting, wanpela dewel i wok long ranim em. Em i ran i go na het dres bilong em pundaun na bruk bruk na kundu tasol, em i holim. Tupela i ran wantaim i go i go inap kundu i pundaun na i bruk. Meri i no stop. Em i ranim em i go i go inap ol nil kanda i bagarapim tru tarangu man bilong em.

Meri ya i larim em i stap na i ran i go bek long ples. Em i go hariap tru wasim graun long skin bilong em gut tru na em i go na slip wetim tulait. Taim tulait i laik kam nau, tarangu man ya i wokabout olsem sik man. Em i isi tru wokabout i kam tromoi spia na banara bilong em i stap na em i wokabout i go long bet. Meri bilong em i slip i stap yet. Taim em i lukluk i go long meri bilong em, em i lukim hap graun i pas i stap long sangana na susu bilong meri ya. Aste yet, man ya save olsem, meri bilong em tasol i bin i go na trikim em. Olsem na hap graun ya, em i no wasim gut na tu meri ya, slip i bagarapim em na em i slip i stap yet. Man ya i tok isi olsem, mi ting dewel tru. Orait, nau em i taim bilong yu, tasol bai mi bekim na bai yu karim nogut.

Ol i stap i go long wanpela taim nau na man ya i tokim meri olsem, ol galip long bus i redi. Na bai ol i mas go na brukim bilong karim i go givim brata bilong meri ya. Man ya i kirap na i tokim tupela pikinini meri long bai tupela i stap na em wantaim mama bai i go brukim galip bilong go givim kandere bilong tupela.

Meri ya i kisim ol samting pinis na tupela i go long bus. Tupela i go kamap long diwai galip ya na man i tok long bai em i go antap na mekim nois na bai ol mau galip i kam daun. Man ya i karim wanpela spia bilong em tu i go antap bilong

paitim ol mau galip. Em paitim planti galip i pundaun pinis nau na em i singaut askim meri bilong em long wanem hap tru em i stap long en. Em i laik meri bilong em i soim em na bai em i tromoi ol galip em i brukim wantaim han i kam daun. Meri ya i tok, hia hia. Tasol man ya i askim em long mekim nois long ol liklik gras ya na bai em i save long wanem hap tru em i stap.

Meri ya i mekim ol gras i sek nau, man ya i klia long wanem hap tru meri i stap. Man ya i kisim spia supsup em i bin karim i go antap ya na tromoi i kam daun. Spia i pundaun antap stret long het bilong meri bilong em na i go kamap long as na planim i stap long graun. Meri i no singaut o mekim nois bikos taim spia i kisim em, em i dai hariap tumas. Tasol man ya ting em i no kisim gut meri bilong em. Em i lukim wanpela blakpela palai i stap long han bilong diwai ya na em i tokim em long go daun na sekap.

Palai ya i go daun na lukim spia i nilim gut tru meri ya long graun. Em i kirap na kisim hap blut bilong meri ya na putim long sangana bilong em long go soim man ya. Taim palai i go kamap antap man ya i askim em, olsem wanem, mi makim gut o mi abrus liklik? Palai i bekim, yu no ken ting moa long en. Yu wanpela sut boi stret. Spia bilong yu i sutim stret het bilong en na i go daun nilim em long graun. Em i dai pinis, lukim blut bilong en ya. Man ya i amamas tru na i go daun kwiktaim.

Em i go daun, kisim naip bilong em na katim tupela susu bilong meri. Em i katim pinis na i go katim wanpela lip bilong wel taro na pasim gut bilong karim i go long ples. Taim em i go kamap long ples em i go putim karamap samting ya insait long garamut. Tupela pikinini meri i lukim em na askim em long mama. Na papa i tokim tupela olsem mama i karim galip i go long givim kandere bilong tupela.

Apinun nau na papa i tokim tupela long go kisim talinga em karamapim long wel taro lip na putim insait long garamut. Em tokim tupela long go kisim na kam kukim. Tupel ai resis i go



kisim na taim tupela i opim karamap ya ol i lukim tupela susu. Tupela i save olsem, em susu bilong mama bilong tupela. Em nau, tupela i save olsem, papa i bin kilim mama.

Tupela i go hait bak-sait long haus na kra i isi stap i go inap tudak. Ol i stap na pasim tok long bekim dai bilong mama bilong tupela. Tupela i go stap wantaim papa bilong ol tasol tupela i no save askim moa long mama bilong ol.

Orait, wanpela taim papa i karim tupela i go long gaden. Papa i hatim wok i stap na nek bilong em i drai. Tupela meri ya i go daun long wara long pulimapim wara. Taim

tupela i pulimapim mambu pinis, bikpela susa i kisim bikpela grasopa tru na putim insait long mambu wara ya. Na liklik susa i kisim wanpela setapit na putim i go insait tu. Tupela i karim i go na givim papa bilong ol long dring. Man ya i nek drai stret na em i no lukluk i go insait. Em i dringim olgeta wara na tupela samting nogut tu.

Long apinun ol i go bek long ples na kuk na kaikai. Tupela samting nogut i stap insait long bel bilong man ya i stat kaikai olgeta kaikai insait long bel bilong em. Taim olgeta kaikai i pinis, ol i stat kaikai bel bilong em. I go inap taim ol i kaikai lewa bilong em na man i dai.

Em tasol.

Francis Rapi,  
Taurama Barracks.



# FANTA

TRADE MARK REGD

IT'S A  
BOTTLE OF FUN



# Kisim Medal Long Kwinn



Gavana Jeneral, Sir Tore Lokoloko i givim tok hepi i go long Kopral Poida Dauda, bilong Militari Plis Seksen long Mari Bareks long Pot Mosbi.

Kopral Dauda i kisim medal ol i kolim Britis Empaia Medal (BEM). Em i wanpela bilong ol 25 pipel husat i kisim Niu Yia Medal long Gavman Haus long Mosbi, las wik.

Kopral Dauda, em i gat 48 krismas. Em i bilong Kurarada Viles insait long Ioma Distrik bilong Noten Provis. Em i stap long Ami inap 29 yia. Em i marit na i gat tupela pikinini.

Poto i soim olupela kaunsila bilong Goroka, Mista Kirupano Eza'e i kisim medal. Em i kisim medal na nem olsem Oda ov Britis Empaia (OBE).

Mista Eza'e i gat bikpela nem long hap bilong em. Em i man bilong bungim ol pipel na harim ol wari bilong ol long graun. Em i hap man tru long mekim i dai ol wari bilong graun na helpim ol pipel long sekan.

Em i kisim medal long han bilong Gavana Jeneral long bikpela haus gavman long Mosbi.

## KAUNSI LA TRAIM





**BAIBEL STORI**

NA LONG PLES OL I MAKIM, EM I BUNGIM TUPELA MAN.



TOKIM KING DEVIT EM I NO KEN I STAP HIA. EM I MAS HARIAP BRUKIM WARAJODAN NA I STAP LONG HAPSAIT.

TUPELA I LUSIM EM, TASOL WANPELA MANKI I LUKIM TUPELA LONG ROT.



MI TING MANKI I LUKIM MITUPELA PINIS. MITUPELA I GO KLOSTU TASOL NA HAIT LONG BAHURIM.

MAN I GO LUKSTIL!

NA MANKI I RAN I GO BEK LONG BIKTAUN NA TOKIM ABSALOM LONG OL SAMTING EM I BIN LUKIM.



YU GO PAINIM OL MAN BILONG LUKSTIL NA KISIM OL I KAM.

OL SOLDIA I BIHAINIM LEK BILONG TUPELA I GO LONG BAHURIM.



MIPELA I PAINIM OL MAN BILONG LUKSTIL. SAMPELA MAN I BIN KAMAP HIA O NOGAT?

TUPELA MAN I KAM, TASOL I GO PINIS LONG BIKPELA WARAJODAN.

OL SOLDIA I WOK LONG PAINIM TUPELA. TASOL OL I NO LUKIM WANPELA MAN NA OL I GO PINIS.



KAM ANTAP NAU. OL SOLDIA I GO PINIS.

OL MAN BILONG ABSALOM I NO INAP SAVE I GAT HUL WARAJODAN NA I STAP HIA. MI AMAMAS LONG EM I NO GAT WARAJODAN.



MI AMAMAS LONG HELPIM KING BILONG MI. TASOL YUPELA MAS I GO HARIAP.

TUPELA MAN BILONG KISIM TOK I HARIAP I GO KAMAP LONG DEVIT NA TOKIM EM. ORAIT NA LONG NAIT YET DEVIT WANTAIM OL MAN I BRUKIM WARAJODAN.



Komik hia i kamap pinis long buk. Yu inap baim long olgeta Kristen Buk Stua.

Used by permission of the David C. Cook Foundation. Copyright 1973. David C. Cook Publishing Co. All rights reserved.



# CENTRAL PACIFIC



## ARAPELA PROVINS

Plis givim ol skin pukpuk bilong yupela long wanem opis bilong Wards Air Cargo i stap klostu long yupela.

Madang — Telipon: 822563  
Lae — Telipon: 422343  
Kieta — Telipon: 956100

Sapos i no gat opis bilong ol i stap klostu long yu, salim ol skin pukpuk bilong yu long dispela adres:

Central Pacific Import/Export,  
C/- Wards Air Cargo  
Port Moresby.

Telipon namba: 211623 / 211635

Salim i kam long Air Niugini, Talair o Douglas balus. Yu mas salim tu nem na adres bilong yu. No ken lusim tingting long raitim namba bilong olgeta skin pukpuk bilong yu. Na tu, yu mas i gat laisens bilong salim skin pukpuk.

Yu save long prais bilong ol arapela lain o save baim skin pukpuk tu? Sapos yu save orait salim tok save bilong prais bilong ol i kam long mipela. Olsem bai mipela inap peim wankain prais olsem ol. Na tu mipela inap peim prais i antap moa long prais bilong ol. Mipela i save baim planti skin moa long ol arapela lain long PNG.

**CENTRAL PACIFIC IMPORT PTY LTD,**  
P.O. BOX 6699,  
BOROKO, N.C.P.

Phone: 211623  
258625 (a.h)

## Sande Lotu

Frank Mihalic

4 Me 1980

SANDE NAMBA 5 BILONG ISTA

— Jon 13: 31 — 35.

Long stori bilong tude, Jisas i autim bikipela lo tru bilong em. Em i tok olsem: "Yupela i mas laikim tru ol brata. Olsem tasol olgeta man i ken save, yupela i disaipel bilong mi."

Olgeta de long nius yumi save harim ol kain kain stori bilong planti pipel i dai long hangre. Yumi harim stori bilong ol bot pipel i ranawe long asples bilong ol. Na yumi save harim tu, planti kantri i wok long helpim ol dispela tarangu. Tasol i gat wanpela lain kantri i no save helpim ol. Em ol komunis kantri, olsem Rasia na Saina na Kuba. Em i bikos em i no lo bilong komunis long helpim brata bilong em. . . . Em i lo bilong ol Kristen. Ol haus sik yumi gat tude, ol i bin stat long ol Kristen kantri tasol. Ol Kristen i tingim ol tarangu i olsem brata bilong em. Dispela kain i bihainim lo bilong Jisas. Laikim brata, laikim arapela man i no wantok, em i mak bilong Kristen. . . .

Dispela tingting bilong ol Kristen i bihainim wanpela tok piksa Sen Pol i bin mekim long bodi bilong yumi yet. Em i bin tok, olgeta hap bilong bodi i save wok wantaim. (1 Kor. 12: 12 — 20). Wan wan hap i wok long helpim narapela hap. Na dispela tok i tru olgeta. Em hia sampela eksampel. Mi lukim samting na mi laikim. Orait, lek bilong mi i karim mi go kisim. Lek i helpim ai. Mi harim dok i bikmaus, mi pret. . . na lek bilong mi i helpim mi ranawe. Lek i helpim ia. Pinga bilong mi i pen, wantu ai bilong mi i wok long painim as bilong pen. Ating wanpela nil i sutim mi. Ai i helpim pinga. Mi gat sik. Bodi bilong mi i mas slip, olsem na lek bilong mi i no gat strong na i no laik karim mi nabaut. Olsem na yumi ken lukim, olgeta hap bilong bodi i wok bilong

helpim narapela hap, na i no bilong helpim em yet.

Dispela em i wanpela Kristen aidia, na em i aidia bilong Jisas: Yumi mas lukaut long brata. Yumi mas laikim brata. Yumi mas wari long em. Yumi mas helpim narapela man. Tasol dispela tingting i no save kamap nating insait long bel bilong yumi. Nogat tru. Yumi mas lainim. Taim ol manki i stap long skul na tisa i lainim ol long pilai soka o basketbal, em i hatwok tru long skulim ol long givim bal i go long man/meri i stap klostu long gol. Olgeta wan wan i laik holim bal long han bilong em yet. Em i no laik salim i go long narapela pilai. . . . Tasol long gutpela tim, ol i save mekim olsem. . . na ol i save win.

Yumi save tingting long yumi yet. Maski arapela man/meri. Na lo bilong Jisas i narakain. Em i tok: yumi mas tingting long narapela man pastaim. Yumi mas daunim laik bilong yumi na wok gut wantaim em. Na dispela lo bilong Jisas i pait wantaim bikipela lo bilong tude na lo bilong bodi. Em i tok olsem i pinisim laik bilong yu.

Olsem tasol na yumi no ken selpis na gridi, na tingting long skin bilong yumi tasol. Long las de, long bikipela kot, Jisas bai skelim yumi. Bai em i olsem wanpela bikipela ekseminesen. Na long dispela ekseminesen bai gat wanpela askim tasol. Yumi laki, tude yumi save pinis bai ol i askim wanem yumi samting. Olsem na tude yet yumi ken redi gut na winim gut dispela las ekseminesen. Jisas bai askim dispela samting tasol: "Yu mekim wanem long ol arapela man? Samting yu mekim long em, yu mekim long mi tu."







# Hara Kap


Pilaia bilong Kadaka i stilim bal long Papane. Olgeta arapela pilaia i spit i kam long helpim tupela pait. Papane winim dispela pilai. Ol i pilai long Yuniuesiti soka graun insait long Mosbi long las wik.

Solo pilaia i kalap kalap amamas i stap bihain long em i sutim wanpela gol i go insait long gol bilong Bun Bun. Lapun man long kona i no amamas long Bun Bun na em i sing-autim namba 1 bilong Bunbun i go kisim sampela skul long soka pastaim. Solo giuim 4-pela kiau long Bunbun.

Papane tu let... Sori,fulbek bilong Kadaka i rausim bal pinis. Maski,traim lak gen long narapela taim.



# Makim Bal Pilai Resis



Dispela pilai resis, em i isi tru. Yu inap winim sampela gutpela prais tru.

Lukim ol pilaia antap. Orait, kisim namba bilong wan wan pilaia na putim dispela namba long bal em bai yusim long kain pilai bilong em.

Pinis, orait, bekim tok bilong kwesten daunbilo (nem na adres). Las tru, yu mas raitim nem na adres bilong yu long pepa antap bilong kol pawa peket. Na salim i kam long dispela adres:

**COLD POWER  
COMPETITION  
P.O.BOX 336  
PORT MORESBY**

EM I SAVE WOK  
LONG KOL WARA

NEM :

ADRES :

Wanpela K30 prais long wan wan wik. NA Yu inap winim ol Adidas samting long mak bilong K50.



Salim planti long laik bilong yu. Tasol insait long wanpela skinpas, yu mas i gat wanpela resis fom na wanpela pepa antap bilong kol pawa peka. No ken putim tupela or tripela long wanpela skinpas. Olgeta wik, i go inap long 5-pela wik, mipela bai putim ol nem long basket na kamautim wanpela. Nem




bilong husat i kamap, em bai winim K30.

Namba 6 wik, olgeta nem bai go insait long basket wantaim nem bilong husat mipela pulim, em bai winim ol adidas samting. Prais bilong ol samting ya, bai i go olsem K50.

Mipela bai rait na tok save long ol wina. Man lukautim dispela pilai resis, em tasol i bos.

C560





Dispela poto i soim John Paul bilong PWD tim i hetim bal klia long mak bilong em. Wanpela Luteran Yut straika i sambai long stilim bal gen. Tasol arapela pilai bilong PWD tim tu i stap long helpim wantok bilong em. PWD tim i winim Luteran Yut.

# Hara Kap

I kam long pes 20

man bilong soka, long husat tru bai winim namba wan prais. pela saveman, Vince O'Neill, em i ting, Yuni tim bai kisim. Em i tok, Yuni tim, em i olsem wanpela masin. Taim yu tanim on, em bai wok tasol. Olsem na dispela masin bai i mas winim namba

wan prais yet.

Lukim long Wantok Niuspepa bilong wik bihain bai yu lukim husat tru i bin winim dispela pilai resis.

Ol man i lukautim na ranim 1980 Ista Nokaut, tenkyu tru long bikpela wok yu-pela i bin mekim. Ol pilai i ran gut tru.

*Goli bilong Cape Nelson i laik holim bal. Em i pasim planti gutpela kik bilong ol Yuni straika. Em kas bilong Cape Nelson goli. Tasol Yuni i putim tripela gol long mak bilong em.*



Dispela poto i soim John Tubs bilong Yuni tim i wok long paulim ol straika bilong Cape Nelson. John, em i wanpela masol fulbek stret bilong Yuni tim. Wanem straika i laik trik, trik about long em. lukaut Nogut xu nundaun olsem pepa.



Goli bilong Balopa i tok, sori tru Francis. Guria tim i laik kikim gol tasol goli bilong Balopa i holimpasim gut pinis. Na Francis Wapi bilong Guria i sambai tasol i stap. Sapos goli i asua, lukaut!!



# SUMITOMO



Askim  
mipela  
long  
strongpela  
taia tru

Lankrusa  
Dyna na  
Stout Taia

SL 803

**DUNLOP**  
Aircorps Rd, Lae  
42-1322

# Yuni Tasol

Ista Wiken long Pot Mosbi, em i wanpela gutpela taim tru long pilai soka long Mosbi. Ista Nokaut i bin kamap long dispela longpela wiken. Nokaut i bin stat long Sarere. Ples bilong pilai long Boroko, i pulap tru long ol pilaia na long ol pipel husat i laik lukim dispela pilai.

Long Sarere i bin i long 6 klok long gat 32 tim i stap Sarere apinun, 18 tim long Nokaut. Na tasol i stap. Ol

Primia tim i pilai gut tru na autim planti bilong ol arapela tim.

Long namba tu de bilong pilai, em long Sande, 16 tim i bin pilai. Long belo stret, 8-pela tim tasol i stap bilong mekim dispela resis. Orait,

long Sande apinun, Sunam tim i autim tiket bilong GFC. Na Guria i waraim Balopa tim nogut tru. Na PWD tim, em i bin laki tru. Klostu tru bai Luteran Yut i rausim nem bilong PWD long dispela pilai resis. Tasol

Selan Polum, i pilai gut tru long fulbek na givim hat taim tru long ol straika bilong Luteran Yut. Olsem na Selan bai karim tim bilong em i go long fainols. Na long Sande apinun tu, Yuni i bin autim Tokenan.

Long Ista Mande, long - moning tim, Guria i pilaim Sunam. Na Yuni i pilaim PWD. Tupela tim i win bai traim paitim bun bilong lukim husat tru bai kisim namba wan prais. Tupela arapela tim i lus long Mande

moning ya, bai traim lukim husat bai kisim namba tri prais na husat bai kisim namba 4 prais. Ol fainols bai kamap long Mande apinun.

Wanpela ripota bilong Wantok i bin askim wanpela save- i go moa long pes 19



*Hia, em i wanpela gutpela gol tru, Guria i givim long Balopa tim. Mathew Itar bilong Guria i kisim kona kik. Man, em i mekim wanpela gutpela banana kik tru. Olsem na yu ken lukim bal i go raunim het bilong goli na fulbek bilong Balopa na i go insait long gol. Guria i winim dispela pilai. Fulbek i lukluk kros i stap.*

## AIR NIUGINI

THE NATIONAL AIRLINE OF PAPUA NEW GUINEA

## HELPIM KANTRI GOHET



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.